

समां - 12:25 hrs.

<><><><><>

Kupwara Encounter

सुरक्षाबलें कुपवाड़ा दे केरन सैक्टर च घुसपैठ दी कोशश गी नाकाम करदे होई इक सांझो अभियान तैहत 2 आतंकवादियें गी मारी मकाया ऐ। घुसपैठ दी कोशश बारे खूफिया जानकारी थहोने मगरा एह सांझा तपाशी अभियान रम्भेया गया हा। सेना दी चिनार कोर नै इस बारे इक सोशल मीडिया पोस्ट च जानकारी दिंदे होई आखेया- सुरक्षाबलें संदिग्ध नक्लो-हरकत दिक्खने परैन्त घुसपैठियें गी ललकारेया- जेहदे चलदे आतंकवादियें सुरक्षाबलें पर अन्नेबाह गोलियां चलाना शुरू करी दिता। एहदे परते च सुरक्षाबलें बी जवाबी कारवाई कीती। अभियान अजें जारी ऐ ते होर ब्यौरे गी अजे बलगेया जा रदा ऐ।

<><><><><><>

Army Cmdr

फौज दी पच्छमी कमान दे कमांडर लेफ्टिनेंट जनरल मनोज कुमार कटियार होरें जम्मू, कठुआ, सांबा ते पठानकोट आहले अगेत्रे इलाकें च तैनात फौजी बलें दिएं कार्रवाईएं सरबंधी तैयारिएं दा जायजा लैता। फौजी कमांडर होरें बलें दिएं तैयारिएं ते सतर्कता पर संदोख जताया ते आखेआ जे साढ़े बल कुसै बी आपात स्थिति दा मुकाबला करने लेई पूरी चाल्ली तैयार न। लेफ्टिनेंट जनरल कटियार होरें बलें दे पेशेवराना जज्बे ते नमीं उभरदी तकनीकें दे इस्तेमाल सने कार्रवाईएं सरबंधी उत्कृष्टता दे उच्चे मयार जकीनी बनाने लेई सराहना

बी कीती। उ'नें आखेआ जे फौजी बलें दी सतर्कता ते पक्का ध्येइया, राष्ट्र दी सुरक्षा ते रक्षा सरबन्धी तैयारिएं दे प्रति भारती फौज दी मजबूत वचनबद्धता गी दर्शादे न।

<><><><><><>

Patnitop Marathon

जम्मू संभाग दी मशहूर सैलानी थाहर पत्नीटॉप च कल 9 नवम्बर गी भारत दी सब्भनें शा शानदार हिल रेस पत्नीटॉप मैराथान-2025 दा आयोजन कीता जा रदा ऐ। मुख्य भरै थमां प्रतिभागी इस मैराथान दी बक्ख-बक्ख श्रेणियें च हिस्सा लैगंन- जिंदे च 50K Ultra, 21 इशारिया 1K Half Marathon, 10 K., 5 K ते इक Walkathonn शामिल ऐ। आयोजकें दस्सेया जे इस कार्यक्रम राहें प्रतिभागियें गी तंदरुस्ती दे कन्नो-कन्नी शानदार पहाड़ी बजारें दा नंद ठोआनें दा बी मौका थोग। इस मैराथान च हिस्सा लैने लेई पंजीकरण आली प्रक्रिया जारी ऐ- जेहड़ लोक बी इनें द्रौड़ें च हिस्सा लैना चाहंदे न, ओह पंजीकरण करोआई सकदे न। अधिकारियें इस बरे दी पत्नीटॉप मैराथन गी खेइड, कुदरत ते रोमांच दा इक जबरदस्त संगम करार दिता।

<><><><><><>

Jammu BSF Marathon

फ्रंटियर मुख्यालय बी.एस.एफ जम्मू आसेया आयोजित पैहली-पैहली जम्मू बी.एस.एफ. मैराथन -2025 लेई 6 जहार शा मते धावकें अपने नां दर्ज करोआए न। एह मैराथन कल

जम्मू दे पलौड़ा च बी.एस.एफ परिसर च होग। इस मैराथन च 42 किलोमीटर, 21 किलोमीटर, 10 किलोमीटर ते 5 किलोमीटर दी द्रौड़ शामिल ऐ ते पूरे भारत थमां प्रतिभागी एदे च हिस्सा लेंगन। इस कार्यक्रम गी शुरू करने आस्तै जंदे रोज पलौड़ा च इक प्रैस कांफ्रेंस दा सरिस्ता कीता गया- जेदी अध्यक्षता बी.एस.एफ जम्मू दे आई.जी शंशाक आनंद होरें कीती ते इस मैराथन तैहत होने आले कार्यक्रमें बारे जानकारी सांझी कीती।



CS Aadhar

मुख्य सचिव अटल डुल्लु होरें जंदे रोज यू.आई.डी.ए.आई. दी अमलावरी कमेटी दी इक बैठक दी अध्यक्षता कीती। बैठक दा मकसद पूरे जम्मू-कश्मीर च आधार सरबन्धित पैहलकदमियें दी समीक्षा करना ते प्रमाणीकरण प्रणाली गी बेहतर बनाना हा। बैठक च दस्सेया गया जे केन्द्र शासित प्रदेश नै इक करोड़ 26 लख आधार नम्बर जारी करदे होई 93 फीसद आधार कवरेज हासल करी लैती ऐ। मुख्य सचिव होरें मैहकमे गी निर्देश दिते जे ओह 5 बरें दी बरेसू तगर दे बच्चें गी तरजीह देन, बायोमैट्रिक अपडेट च तेजी आनन ते मती पारदर्शिता लेई क्यू-आर. कोड समर्थन प्रमाण-पत्रें गी लागू करन। जिलें, स्कूलें ते आंगनवाड़ी केन्द्रें च विशेष नामांकन शिविर लागन। यू.आई.डी.ए.आई. नै प्रमुख धार्मिक थाहरें पर फेस ऑथेंटिकेशन दा इस्तेमाल करने दा सुझा दिता ऐ जिसलै के नमें आधार सेवा केन्द्र ते उन्नत प्रामाणिकरण प्रणाली कन्नै पूरे जम्मू-कश्मीर च सेवा देने च होर मता सुधार होग।



GST Workshop

जम्मू-कश्मीर दे स्टेट टैक्स विभाग ने कल जम्मू आहले एक्साईज़ ते टैक्सेशन कम्पलैक्स च जी.एस.टी प्राइम एनालिटिक्स टूल ते ई-वे पोर्टल दे बारै च इक ध्याड़े दी सिखलाई कार्यशाला दा सरिस्ता कीता। इस पैहलकदमी दा मकसद इस गल्लै गी जकीनी बनाना हा जे किस चाल्ली एकड़े डिजिटल सरिस्तें दे राहें जी.एस.टी सरबंधी कम्में च बेहतरी दे कन्नो-कन्नी टैक्स सरबंधी प्रशासन च मती दक्षता आहन्नी जाई सकदी ऐ। दौनों डिवीजनें दे अधिकारिणं इस कार्यशाला च हिस्सा लैता- जिसलै के किश अधिकारी ऑनलाईन बी एहदे च शामिल होए। इस कार्यशाला दे राहें टैक्सें सरबंधी अधिकारिणं गी आधुनिक डिजिटल माध्यमें दे इस्तेमाल बारै जानकारी बनाया गेआ- तांजे जी.एस.टी सरबंधी नियमें दी पालमा गी स्हेई ढंगै सिर तोढ़ चाढ़ेआ जाई सकै।



Kishtwar Heritage Conservation

किश्तवाड़ दे जिला विकास कमिशनर पंकज कुमार शर्मा होरें वास्तुकला ते विरासती संरक्षण सरबंधी केन्द्र शासत प्रदेश दी योजना दे तैहत विरासती थाहरें दे संरक्षण ते पुर्नबहाली आहली परियोजनाएं दा जायजा लैने लेई कल इक बैठक दी प्रधानता कीती। इनें प्रमुख परियोजनाएं च साईं द्रमन ते भाटा दिमिजी आहली थाहरे दे संरक्षण, देवीगोल ज्वाला माता ते रघुनाथ जी मंदरें दी पुर्नबहाली ते हलोटी च धर्मशाला दे निर्माण आहले

प्रोजेक्ट शामिल न। डिप्टी कमिशनर होरें लोक निर्माण विभाग गी निर्देश दिते जे ओह इ'नें सबनें कम्में गी रिवायती वास्तुकला आहली तर्ज पर तोढ़ चाढ़न। उ'नें जोर देइयै आखेआ जे इ'नें विरासती थाहरें दे संरक्षण कन्नै किश्तवाड़ दी सांस्कृतिक पन्छान ते खिते च धार्मिक सैलसफा गी बी बढ़ावा थहोग।

<><><><><><>